

Հմայական Դավիթ
Սևանի Վազգենյան հոգևոր դպրանոց, 4-րդ կուրս
Էլ. փոստ՝ vta1897@yahoo.ie

ԳԱՐԵԳԻՆ ՆԺՂԵԻՂ, ՔՐԻՍՏՈՆԵՈՒԹՅՈՒՆԸ ԵՎ ՀԱՅ ԵԿԵՂԵՑԻՆ. ՀԱՏՈՒԿ
ԱՆԴՐԱԴԱՐՉ «ՄԵՐ ՀԵՂԱՓՈԽՈՒԹՅԱՆ ԱՐԱՐԻՉԸ» ՀՈՂԱԾԻՆ

Եղել եմ հավատքի և էթիկայի մար
Հավատքի և պաշտամունքի տեղերում
միշտ էլ առաջին տեղերը հատկացրել եմ
Աստծուն ու Հայրենիքիս:
Գարեգին Նժդեհ

Գարեգին Նժդեհը, որը մեծ ռազմական, քաղաքական և ազգային գործիչ լինելով հանդերձ, նաև շատ մեծ մտածող է ու թողել է հարուստ ստեղծագործական ժառանգություն, մինչև այսօր էլ վերագնահատման ու ճիշտ հասկացման պահանջ է զգում: Նժդեհի ստեղծագործական ժառանգության ուղղությամբ կատարվող ուսումնասիրությունների շրջանակներում մինչև այսօր էլ պարզաբանված չէ այն հարցը, թե արդյոք Նժդեհը քրիստոնեական դավանանքի հետևորդ էր, թե՛ ոչ: Հաճախ այդ խնդրի ոչ ճիշտ արժեքավորման, վերլուծության հետևանքով տարբեր մասնագետներ գիտակցաբար կամ էլ անգիտակցաբար ջուր են լցնում մի շարք աղանդավորական շարժումների ջրաղացներին: Ընդհանրացնելով ուսումնասիրությունների արդյունքները՝ կարելի է առանձնացնել երեք տարբեր մոտեցումներ:

Առաջին մոտեցման շրջանակներում Նժդեհը ներկայացվում է որպես քրիստոնյա մտածող, իսկ ահա երկրորդ մոտեցման շրջանակներում վերջինս, ընդհակառակը, ներկայացվում է որպես ոչ քրիստոնյա, հեթանոս մտածող, որն իր «Ցեղակրոն» գաղափարախոսությամբ փորձում էր վերածնել հայոց հին հեթանոսական կրոնը: Երրորդ մոտեցման շրջանակներում Նժդեհը չի ներկայացվում որպես որոշակի դավանանքի հետևորդ: Թերևս այս մոտեցումն ամենահաջողն է, քանի որ քրիստոնեության և Քրիստոսի մասին Նժդեհի արտահայտած բազ-

մաթիվ դրական մտքերը¹ ոչ մի հիմք չեն տալիս պնդելու, որ Նժդեհը հակաքրիստոնյա է և միևնույն ժամանակ, հաշվի առնելով հեթանոսության մասին նրա արտահայտած դարձյալ դրական մտքերը, ոչ մի հիմք չունենք պնդելու, որ նա քրիստոնյա է: Ուստի սխալված չենք լինի, եթե համաձայնենք Մ. Լալայանի հետևյալ կարծիքին. «Նժդեհը չի հակադրում Վահագնին և Քրիստոսին, կամ՝ հայկականն ու քրիստոնեականը, այլ՝ դրանք խորքում տեսնում է համադրելի»²:

Երկրորդ մոտեցման կողմնակիցներն իրենց վարկածը հիմնավորելու համար հիմնականում անտեսում են քրիստոնեության մասին Նժդեհի ասած դրվատանքի խոսքերը, ինչպես նաև շատ հաճախ մեկնաբանում են նրա որոշ խոսքեր համատեքստից դուրս: Նման դեպքերի ամենավառ օրինակը «Մեր հեղափոխության արարիչը»³ (1924 թ.) հոդվածում տեղ գտած որոշ դատողություններն են, օրինակ՝

*Ի՞նչը քեզ մղեց միամտորեն հավատալու ցնորապաշտ նազովրեցու վտանգավոր խոսքին... Դու խաբված ես ժողովուրդ, որ զոհն ես քրիստոնեական բարոյախոսության, որ շարունակում է մնալ որպես ներկ և չպար, որպես քող և դիմակ ու ժողների հոգու համար*⁴:

Հիմնվելով այս հատվածի վրա՝ երկրորդ մոտեցման կողմնակիցներն իրենց թեզիսը հիմնավորելու համար բերում են այն փաստարկը, թե Նժդեհը Քրիստոսին իբր անվանել է ցնորապաշտ, նրա խոսքը՝

¹ Օրինակ՝ «Նրա (Հիսուս Քրիստոսի - Ղ.Գ.) անձնական կյանքը պիտ դառնայ եկեղեցու ուղեցոյց: Նրա մահուան խորհուրդը - հերոսական զոհաբերութիւն: Նա զոհաբերեց, որովհետև գաղափարի հերոս էր: Միայն արին, քաջը, միայն հերոսը կարող է զոհաբերել» (տե՛ս Նժդեհ Գ., Երկեր, Երկու հատորով, հ. 1, Երևան, 2002, էջ 69), «Քրիստոնյան նա՛ չէ ով քրիստոնեական վարդապետության տարերքը սխալ է հասկացել, ընկել նախապաշարումների ցանցի մեջ և տկարացել կորչելու աստիճան, այլ նա, ում մեջ մի քիչ քրիստոնեություն կա - մի կայծ ամենահզոր աստվածամարդու հոգուց» (տե՛ս նույն տեղում, էջ 125), «Սկզբից ի վեր հայութիւնն եւ իր քրիստոնեությունը ձուլուած են ի մի բնութիւն» (տե՛ս Նժդեհ Գ., Ամերիկահայությունը. ցեղը և իր տակաճը, «Ազգայնական միտք», թիվ 7, Երևան, 2000, էջ 70):

Նժդեհը նաև փորձել է, ինչ-որ առումով, «հաշտության» եզրեր գտնել հեթանոսության և քրիստոնեության միջև. «Վահագնի հետ պիտի խոսենք հիմա, Աստվածը հին արիական հայության: Մի նոր գիրք պիտի դրվի մեր ժողովրդի ձեռքը - Ավետարանը Արիների» (տե՛ս Նժդեհ Գ., Երկեր, էջ 124), «Հայն իր Վահագն ուներ - աստվածը քաջուրջան: Քաջ եւ քաջապաշտ է նա: ... Քաջ են, ընդհանրապես, ոգու ժողովուրդները: Սրանցից է հայը՝ զերազանցօրէն: Հեթանոս հայու քաջութիւնը չտկարացաւ նաև քրիստոնեական Հայաստանում: Մխրագործելու իր տենչանքին զուգահեռ դա ընդունեց արտասայտութեան մի նոր ձեւ եւս - նահատակութիւն կամաւոր, որն իր խորքի մէջ ոչ այլ ինչ է, քայց եթե՛՝ գիտակցական մահուամբ անմահանալու ձգտումը» (տե՛ս Հատընտիր / Նժդեհ Գ., Երևան, 2001, էջ 255):

² Լալայան Մ., Ցեղակրոն և տարոնական շարժումներն ու Գարեգին Նժդեհի գործունեությունը, Երևան, 2-րդ քարեփոխված հրատարակություն, էջ 34:

³ Տե՛ս Հատընտիր / Նժդեհ Գ., էջ 306 - 308:

⁴ Այս հատվածը ներկայացված է Նժդեհի՝ «Հավատամք» խորագրով (1991, Երևան) լույս տեսած գրքի «Կյանքը» բաժնի վերջում:

վտանգավոր, իսկ քրիստոնեական բարոյախոսությունը համարել է հայ ժողովրդի դժբախտությունների հիմնական պատճառը: Կարդալով հոդվածից մեջբերված վերհիշված տողերը՝ կարելի է միանշանակ խոսել Նժդեհի հակաքրիստոնյա լինելու մասին: Բայց իրականում այս հատվածը ոչ այլ բան է, եթե ոչ «Մեր հեղափոխության արարիչը» հոդվածի համապատասխան հատվածի մասնակիորեն վերափոխված տարբերակը, որը հոդվածի համատեքստից դուրս մեկնաբանվելու դեպքում այլևայլ հարցադրումների տեղիք է տալիս: Ասվածն առավել առարկայական կդառնա, եթե ներկայացվի հոդվածի այդ հատվածը: Վերջինս ունի հետևյալ տեսքը.

*Գողգոթային՝ Արեւմտահայաստանէն կը բարձրանար աղաղակը
հաւաքավառ խաչեցեալի. – օգնութիւն, փրկութիւն ինձ:*

Իսկ մարդկութիւնը՝ յանցաւոր ու անտարբեր, կը պատասխանէր.

- Ծարա՛ւ ես, արբ արցունքդ...

- Կոտորու՛մ ես, ջրի չա՛փ էլ արժէք չունի արիւնդ՝ դու ես մեղաւոր, որովհետև թոյլ ես...

- Կողոպտու՛մ ես, տէր չե՛ս վաստակիդ՝ դու ես մեղաւոր, որովհետև թոյլ ես...

- Շղթաների մէ՛ջ կը ծնեն, կապրեն, կը մեռնեն զաւակներդ՝ դու ես մեղաւոր, որովհետև թոյլ ես...

- Կա՛խ է գլուխդ, խոնարհ է ծակատդ, բռնութեան լծի տակ երկտակուա՛ծ է մէջքդ, պատուիդ տերը չե՛ս, ցեղիդ սրբազան լեզուէն օգտուվելու իրաւունք իսկ չունե՛ս, վաղու՛ց է ինչ եկեղեցիներիդ զանգերի քաղցր դողանքը չես լսում, առանց իտեալի եւ վեհութեան կը սողա՛ս միայն - ստրու՛կ ես՝ դու ես մեղաւոր, դու. ի՛նչը մղեց քեզ միամտօրէն հաւատալու ցնորապաշտ Նազովրեցու վսեմ, բայց վտանգաւոր խօսքին: Ո՛վ ասաց, որ թոյլը մեղաւոր չէ, որ թոյլ է, եւ ուժեղը երախտիք չունի, որ ուժեղ է: Դու խաբուած ես ժողովուրդ, որ գոհն ես քրիստոնեական բարոյախոսութեան, որ շարունակում է մնալ որպէս ներկ եւ շպար, որպէս քօղ եւ դիմակ ուժեղների հոգու համար: Ուժն է ծնում իրաւունքը: Ուժեղին է աշխարհը, հայրենիքը, ազատութիւնը եւ ամեն ինչ:

...
- Այս էր աշխարհը հայկական գողգոթայի հանդէպ: Այսպէս կը պատասխանէր մարդկութիւնը մահուան դատապարտուած այս ժողովուրդին, որը չէր ուզեր մեռնիլ, բայց չէր կարող եւ ապրել՝:

Համեմատելով այս երկու հատվածները կարելի է նախ և առաջ նկատել, որ առաջին հատվածում բացակայում է «վսեմ» բառը և առանձնահատուկ կերպով Քրիստոսի խոսքը ներկայացվում է միայն որպես «վտանգավոր» երևույթ, ինչպես նաև խոսքերի «հեղինակների»

¹ Հատընտիր / Նժդեհ Գ., էջ 306 - 307:

տարբերությունն է ակնհայտ: «Հավատամք» գրքում լույս տեսած տողերը կարդալով այնպիսի տպավորություն է ստեղծվում, որ այդ մտքերը Նժդեհի խոսքն է ուղղված հայ ժողովրդին, բայց համատեքստում կարդալով այդ հատվածը՝ պարզ տեսնում ենք, որ դա «հանցավոր ու անտարբեր մարդկության» պատասխանն է օգնություն կանչող «հավաքավառ խաչեցյալին», այսինքն՝ հայ ժողովրդին:

Սակայն պետք է նշենք, որ այս հատվածը տարբեր մեկնաբանություններ է ստացել: Օրինակ՝ Վ. Միրզոյանը այն կարծիքին է, որ Նժդեհն անուղղակի ձևով՝ օտարի շուրթերով է արձանագրում դառը ճշմարտությունը¹: Իսկ ահա Ռ. Համբարձումյանը նշում է, որ այդ խոսքերը Նժդեհի համար միանշանակորեն անընդունելի են, քանի որ այդպես է ասում «հանցավոր ու անտարբեր» մարդկությունը²: Թերևս այս տեսակետի օգտին է խոսում այն հանգամանքը, որ մեջբերված հատվածի թե՛ սկզբում, թե՛ վերջում Նժդեհը նշում է, որ այդպես «կը պատասխանէր մարդկութիւնը»: Ա. Պետրոսյանն էլ անդրադառնալով այն փաստին, որ հոդվածում տեղ գտած հատվածը համատեքստից կտրված վիճակում է ներկայացվում՝ գրում է. «Արդյունքում «հանցագործ ու անտարբեր մարդկության» կարծիքը վերագրվել է Նժդեհին, որի համաձայն Նազովրեցին ... ցնորապաշտ է, իսկ նրա խոսքը՝ վտանգավոր»³:

Հաճախ երկրորդ մոտեցման կողմնակիցներն իրենց տեսակետը հիմնավորելու համար դիմում են լռության փաստարկին: Այսինքն՝ նրանք իրենց թեզիսը հիմնավորելու համար անտեսում, լռության են մատնում հակառակ փաստարկը, որով ցանկանում են ցույց տալ հակառակ փաստարկի թուլությունը: Բայց այս պարագայում միանշանակ պարզ է, որ նման մոտեցումն անտեղի է:

Եթե նույնիսկ ընդունենք Միրզոյանի տեսակետը և համաձայնենք երկրորդ մոտեցման ջատագովների հետ, ապա տրամաբանական հարց է առաջանում. ինչո՞ւ է Նժդեհն իր բազում աշխատություններում («Բաց մամակ հայ մտավորականությանը», «Ամերիկահայությունը, ցեղը և իր տականքը» և այլն) դրական է արտահայտվում Քրիստոսի և քրիստոնեության հասցեին: Նաև խնդրո առարկայի հետ կապված ճիշտ կլինի անդրադառնալ Նժդեհի կենսագրական բնույթի որոշ փաստերի. Նժդեհն իր ամբողջ կյանքի ընթացքում որևէ գործ չի սկսել՝ առանց Աստծո անունը տալու, նույնիսկ իր գեները և սպարապետական գոտին օժել է տվել եկեղեցուն: Նա իր բոլոր ռազմական գործողությունները

¹ Միրզոյան Վ., Նժդեհի դավանանքի բնույթի շուրջ, «Դարձ», 2002, փետրվար, թիվ 29, էջ 40:

² Համբարձումյան Ռ., Գարեգին Նժդեհ, Երևան, 2003, էջ 42:

³ Պետրոսյան Ա., Գարեգին Նժդեհը եւ քրիստոնեութիւնը, Երևան, 2001, էջ 15-16

սկսել է եկեղեցուց կամ էլ աղոթքով¹:

Եթե մանրամասնորեն ուսումնասիրենք Նժդեհի գրական ժառանգությունը, ապա պարզ կտեսնենք, որ նա ոչ թե հակաքրիստոնյա է, այլ ավելի շուտ հակաեկեղեցական: Նա գրում է. «Դա (Եկեղեցին - Դ. Դ.) վերագնահատումի պետք է ենթարկի քրիստոնեական իր սխալ ըմբռնումը, որպեսզի դադարի թուլությունն առաքինություն համարել և սպանել մեր ժողովուրդի կամքը: Սխալ է ըմբռնել դա քրիստոնեական սիրո խորհուրդը և դրա հետևանքով ամբողջ դարեր պատճառ դարձել մեր ժողովուրդի անօրինակ ողբերգության: Սխալվել, չարաչար սխալվել է մեր Եկեղեցին՝ «տմանկների» և «սնանկների» բարոյականություն քարոզելով: Սրանից հետո սիրո և գոհաբերության ընդունակ արի ժողովուրդի մասին պիտի խոսի, եթե ուզում է, որ քրիստոնեության հետքերը մնան Փոքր Ասիայում և Հայաստանում»²:

Նժդեհը, փաստորեն, մերժում է սիրո այնպիսի դրսևորումը, որը տանում է կործանման, հնազանդության, թուլության և զրկում թշնամու դեմ կռվելու, ինքնապաշտպանվելու հնարավորությունից, ինչպես նաև քննադատում է Հայ Եկեղեցուն, որը, նրա կարծիքով, հենց այդպիսի սեր է քարոզել՝ սխալ հասկանալով քրիստոնեական սիրո խորհուրդը: Նա նաև չի ընդունում թույլ մարդու սերը. նրա կարծիքով սիրում է նա, ով ուժեղ է. «Արգասաւոր չէ թոյլի սերը: Քծնանք է թոյլի ներումը: Անընդունակ է թոյլը ինչպես սիրոյ, նոյնպես եւ գոհաբերութեան»³:

Միանգամայն ընդունելի է Նժդեհյան սիրո գաղափարը, որը չի հակասում նաև քրիստոնեական սիրո գաղափարին⁴, բայց արդարության առջև չմեղանչելու համար տեղին կլինի նշել, որ Նժդեհի այն կարծիքը, թե Հայ Եկեղեցին իբր «տմանկների» և «սնանկների» բարոյականություն է քարոզել, այնքան էլ չի համապատասխանում իրականությանը: Հասկանալի է, որ Նժդեհն այս խոսքերն ասել է՝ ազդված լինելով Նիցշեի նմանատիպ գաղափարներից (վերջինս ծնվել և մեծացել է բողոքական ընտանիքում և հետևաբար քրիստոնեությունն ընկալել է բողոքականության տեսանկյունից, որը նրա ապրած ժամանակաշրջանում իրոք գտնվում էր «անկուսային» շրջանում՝ «քարոզելով» քրիստոնեության ոգուն ոչ հարիր գաղափարներ), բայց նա հավանաբար մի պահ աչքաթող է արել այն կարևոր հանգամանքը, որ Եկեղեցին միշտ էլ գործում մասնակցություն է ունեցել հայ ժողովրդի մղած գոյամարտերին և շատ հաճախ էլ հենց ինքը՝ Եկեղեցին, է ստանձնել առաջամարտիկի

¹ Համբարձումյան Ռ., Վարդ Նժդեհի, Երևան, 2001, էջ 105:

² Գարեգին Ն., Երկեր, էջ 125:

³ Հատընտիր / Նժդեհ Գ., էջ 89:

⁴ «Սիրեցեք ձեր թշնամիներին» Աստվածաշնչյան խոսքը (Մատթ. Ե:44) պետք է հասկանանք այն կտրվածքով, որ անհրաժեշտ է ուժեղ լինել թշնամիներից, որպեսզի կարողանանք սիրել նրանց:

գործառույթները: Այդ ամենը մենք պարզ տեսնում ենք Վարդանանքից սկսած մինչև Նժդեհի ապրած օրերը՝ մինչև Սարդարապատի հերոսամարտը (ինչպես նաև մեր ապրած ժամանակաշրջանում):

Այսպիսով, եթե ամփոփելու լինենք Նժդեհի գրական ժառանգության վերաբերյալ ուսումնասիրությունը, պիտի նշենք, որ նա, եթե անգամ քրիստոնյա չի եղել, ապա առավել ևս չի եղել հակաքրիստոնյա: Նժդեհը, լինելով համադրական (կոմպլեկտային) մտածող, փորձել է քրիստոնեական և հեթանոսական կրոններից դուրս բերել և մեկ գաղափարախոսության ներքո միացնել ու տարածել այն, ինչը կենսական նշանակություն ուներ հայ ժողովրդի համար տվյալ ժամանակաշրջանում, ինչը կփրկեր հայ ժողովրդին վերահաս կործանումից. այն է՝ միասնություն, քաջություն, ինքնազոհաբերման պատրաստակամություն, ուժեղի և հաղթողի հոգեբանություն: Թերևս ճիշտ է, Ս. Չաքարյանի այն տեսակետը, որ Նժդեհը նման է մեղվի, ով նույնիսկ իրար հակադիր ուսմունքների մեջ կարողանում էր տեսնել մարդկային ոգու, ստեղծագործ ուժի լավագույն դրսևորումները՝ հավաքելով դրանցից իրեն անհրաժեշտ նեկտարը¹:

Annotation

In literature of Garegin Njdeh one can notice that if he wasn't a Christian, so he wasn't also Antichristian. He tried to create a new ideology in synthesis of Christianity and Pagan, which was very important in saving of Armenian nation.

Аннотация

Познакомившись с литературным наследием Гарегина Нжде, то можно увидеть, что если он не был христианином, то и не антихристианином. Он попробовал создать в синтезе христианства и язычества новую идеологию, которая была очень важна для сохранения армян.

¹ Տե՛ս Չաքարյան Ս., Գարեգին Նժդեհի (փիլիսոփայական ճեպանկար), Երևան, 2001, էջ 10: